

Inuusuttut inersimasullu innarluutillit atuartinneqarnissaannut, ilinniagaqalernissaannut suliffeqarnissaannullu kommunit inatsisit atuuttut naapertorlugit sunik pisussaaffeqarnerannik Naalakkersuisut erseqqissaassuteqaqqullugit Inatsisartut aalajangiiffigisassaattut siunnersuut.
(Inatsisartunut ilaasortaq Agathe Fontain, Inuit Ataqatigiit)

Akissuteqaat

(Ilaqutariinnermut Inatsisinillu Atuutsitsinnermut Naalakkersuisoq)

Siullermeerneqarnera

Aallarniutigalugu inuusuttut inersimasullu innarluutillit atuartinneqarnissaannut, ilinniagaqalernissaannut suliffeqarnissaannullu kommunit inatsisit atuuttut naapertorlugit sunik pisussaaffeqarnerannik Naalakkersuisut erseqqissaassuteqaqqullugit siunnersuummut Naalakkersuisut qujapput.

Naalakkersuisooqatigiinnissamik isumaqatigiisummi erseqqisumik allassimavoq nunami maani innarluutillit innuttaasut allat assigalugit pisinnaatitaaffeqartut. FN-ip innarluutillit pillugit isumaqatigiisutaa naapertorlugu innarluutillit pisinnaatitaaffii qularnaarniarlugit Naalakkersuisut aamma suliniarput. Aammattaaq inunnut innarluutilinnut ilinniagaqalernissamut suliffeqarnissamullu Naalakkersuisut periarfissaqarnerulersitsiniarput.

Inuit annertuumik innarluutillit ilinniagaqalernissamut periarfissaqarnissaasa qularnaarneqarnissaannut tunngatillugu Inatsisartut peqqussutaanni nr. 10-mi, 31. maj 2010-meersumi § 7, imm. 2, nr. 10-mi aalajangersaasoqarpoq atuarnermik naammassinninnerup kingorna illiuisissatut pilersaarusiortoqartassasoq.

Kommunit taamatut iliuusissatut pilersaarusiorniarnermik unammilligassaqaarsinnaanerat Naalakkersuisunit ilisimaneqarpoq. Naalakkersuisulli isumaqarput kommunit inatsit naapertorlugu pisussaaffimminnut tunngatillugu suleriaatsiminnik pitsangorsaaniarlutik ilungersortut.

KANUKOKA suleqatigalugu innarluutilinnik isumaginninnerup kommuninut nuunneqarneranik naliliisoqaleruttoq. Naliliineq taanna piareerpat Naalakkersuisut kommuninik qanimut oqaloqateqarlutik unammilligassaasinnaasunut tunngatillugu suliniuteqarniarput.

Taamaattorli innuttaasunut innarluutilinnut atugassarititaasut sammineqarnissaannut pitsangorsarneqarnissaannullu suliniarnerit Naalakkersuisunit aallartinneqareerput. Ilaqutariinnermut Inatsisinillu Atuutsitsinnermut Naalakkersuisoqarfik 2014-imi marsimi angajoqqaat peqatigiiffiat INOOQAT suleqatigalugu ataatsimeersuartitsivoq "Kalaallit Nunaanni inunnut ineriartornermikkut inortunut tunngatillugu unammilligassat, pisariaqartitat siunissamilu periarfissat" qulequtaralugu. 26. Ataatsimeersuarnermi meeqqat inuusuttullu ineriartornermikkut inortut, kiisalu ilaqutariit ineriartornermikkut inortunik meerartallit inuusuttallillu sammineqarput.

Tamatuma saniatigut IPIS iliuusissatut pilersaarusiortarnermi ulluni pingasuni pikkorissartitsinissamik neqerooruteqarpoq. Pikkorissartitsinerit nunap immikkoortuini pissapput pikkorissartitsinnermut

nangitsissutitut najukkami malitseqartitsinertalimmik. Pikkorissartitsineq malitseqartitsinerlu siulleq 2014-imi ukiup affaani kingullermi pisussatut pilersaarutaavoq. 2015-imi taamatulli amerlanerusunik pikkorissartitsisoqarnissaa naatsorsuutigineqarpoq.

Taamatuttaaqq 2014-imi juunimi isiginiarnikkut innarluuteqartunut pikkorissartitsisoqassaaq/naapeqatigiisitsisoqassaaq. Tassunga atatillugu isiginiarnermikkut innarluutilinnut ilinniagaqarusuttunut inuussutissarsiutitigut ilitsersuisoqassaaq. IPIS-ip maanna Knud Rasmussenip Højskolia aamma Videnscenter om ordblinde i Danmark suleqatigalugit inersimasunut naqinnernik ilisarinnissinnaangitsunut atuartitsinerup aallartinneqarnissaa sulissutigaa.

Innuttaasut pineqartut nalinginnaasumik ilinniagaqarsinnaangippata suliffeqarsinnaangippatalu piginnaangorsaaqqinneq pillugu inatsisartut peqqussutaat naapertorlugu nunatsinni inersimasut peqqissutsikkut aporfeqarnertik pissutigalugu inuussutissarsiorsinnaassusikillimasut suliffeqarsinnaassusikillimasulluunniit ilinniagaqarnissaannut suliffeqarnissaannullu ikiorsiinissamut periarfissanik kommunit eqqumaffiginninissaat Inuussutissarsiornermut, Aatsitassarsiornermut Suliffeqarnermullu Naalackersuisoqarfiup suliassaqarfimmigut pisussaaffigaa.

Ilinniartitsinermik, suliffeqarfimmik piginnaangorsaanermik, atuaqqinnermik suliffinnullu aalajangersimasunut sungiusarnernik ingerlatsinissamut tapiiffigitinnissamut qinnuteqaatit saniatigut piginnaangorsaaqqinnissamut periarfissat nalinginnaasumik atorfininnermik kinguneqarsinnaangippata piginnaangorsaaqqinnissamik neqeroorut alla tassaasinnaavoq piffissani nikerartuni suliffeqarneq. Namminersorlutik Oqartussat aningaasartuutit affaat angullugit piginnaangorsaaqqinnermut tapiissuteqarsinnaapput.

Ilaatigut innuttaasut neqeroorutinik innuttaasup suliffeqalernissamut taperserneqarnissaanik siunertaqarfiusunik toqqaanissamut tunngatillugu suliffissarsiuussisarfiit tapersersuillutillu ilitsersuisussaapput. Tapersersuinerup sorliup innuttaasumut neqeroorutissatut pisariaqartinneqarnissaanik kissaateqarnermik takutitsiviusumik iliuusissatut pilersaarusiortoqassaaq.

Taamaalillutik Naalackersuisut suliniutinik arlalinnik, kommunit inatsisitigut pisussaaffinnik malinninnissaaq pillugu ilisimatinneqarnerannik tapersersorneqarnerannillu ataatsimut isigalugu kinguneqartussanik aallartitsererput.

Naalackersuisut oqallittoqaluarnissaanut qilanaarput siunnersuutillu taama isikkoqartillugu akuersissutigineqarnissaa inassutigalugu.